

四庫全書

集部

欽定四庫全書

秋澗集卷二十九

元 王惲 撰

七言絕句

題武元直畫巢雲曙雪圖

千丈雲巢曙雪寒  
清談誰似二公閒  
京師三到凡三見  
夢遶煙林紫翠間

蒼雪亭為劉參政賦

將軍塵市有山林亭下雙松鎖翠陰  
一夜雪花來點綴  
蒼蒼特表歲寒心

蒼雪詩成玉局翁左山題扁取清雄  
翛然坐對橫枝處  
不到東華踏軟紅

過賈左輔墳林

雲陣橫陳賈氏林蒼煙埋沒石麟深  
堂堂地下開天業  
只聽黃鸝送好音

桃花鵝鵝圖

桃花鷄鵲滿春江睡暖晴沙夢亦香何處秋風南去鴈  
斷雲寒影不成行

答楊元甫問

勁於屈鐵無強梗媚比嬌姝峻潔貞元甫見詢曹岳答  
筆端流潤自圓生

答劉少卿顏書之問

仙壇郭廟八關文襄國濠州半籀分五帖論來皆具體  
就中勁甚是殷君

留別簫事張鵬飛

闕  
鵬飛簫事以三詩餞行甚有情致但愧襄

闕





筠林暮雨

共山山下送征騑  
卓水歸時趁醉題  
十萬壯夫飄灑處  
一燈長記宿筠溪

入定州北門偶得

千雉嚴城鼓角寒  
當年韓富倚為安  
後人苦笑書生懦  
白羽風雲屬將壇



雲林曉汲

家住清林杳靄間  
瓦瓶乘月汲冷澗  
山中道士金椒客  
煮盡溪頭白石圓

山中雜詩

路回峰轉認山形  
周折東來似曲肱  
偶倚斷崖南北看  
兩鯨挾輔一龍騰

長風催雨入山門  
洗淨埃霾面目真  
領取封靈相敬意  
儘堆空翠待詩人

騎乘藍輿步總宜雨晴龍首有餘姿興來題破蒼苔石  
紀我青山獨到時

徐童絕觀曉煙蒼盡得東風草木香鞍口迤西山更好  
惜教無力到禪房

山前三院說中溪蕙帳空來夜鶴悲一片短碑空晤語  
宣尼堂下久搢頤

又題鹿庵與王子襄先生手書後

一代高人王鹿菴幽潛來住百門龕詩瓢藥竈當時友

政有先生德不慙

劉齊王讀書堂

在阜城北墉下

當年齊相讀書堂此日金華表佛幢碧色尚餘書帶草  
綺疏猶是聚螢牕

平原縣有懷顏太師忠節

羯奴獵火九州空平地孤城與抗雄十七郡兵同日集  
奮從吾首倡孤忠

記右脅誌文

昔相工謂王欽若貌異當貴或云鼻斜何如曰他日  
作相自正後果然予右脅有六紅誌一黑子狀成斗  
文其黑子終非同色又遠而不應曲詰至元廿年二  
月廿一日因浴出見一紅誌忽生其下遂足成杓狀  
吁亦異哉因書此以紀其生發月日云

脇間素有七星文黑誌權杓遠且昏忽出一星為補正  
隱然高起更紅溫

讀老泉先生審勢審敵二篇

清時無故厲兵刑審勢雖深衆目驚轉首翠華牽率去  
老泉幾策見來明

二虜先須一掃清萬方然後論升平周文未免昆夷患  
却訝先生以筆爭

赴任濟南前次黃岡作

征車轆轤二旬間泥雨長途備阻艱行近黃岡都忘却  
一峰金翠得華山

今年東赴濟南行帶雨拖泥二十程只為此身飢凍迫

幾回辛苦歎勞生

過濟河縣北晏嬰城

一製孤裘四十年當時功烈管差肩  
細思款對崔門語又見臨機勝趙宣

三士輕生死二桃善謀誰似晏卿豪  
朝來采邑城東路欲訪林丘挂佩刀

濟河道中

今稱為齊河蓋偶忘點水耳地名  
耿濟後漢耿弇破張布于此故名

甲子東遊入泰安封壇日觀總躋攀  
誰知二十年來後

却向齊西看泰山

匡山

匡山說有舊茅廬李白當年此讀書嵐氣宛如吟醉重  
野雲時學簡編舒

公堂

臆吏前頭擁簿書午衙急散日停晡南山翠倚公堂上  
終日相看有若無

九日登歷下亭

當年厯下富材賢李杜文章兩謫仙此日風流俱不見  
秋煙空溼採菱船

周文矩雷劍化龍圖

圖底幽光見斗間張華腰領不勝寒躍淵又作雙龍去  
在晉當為變怪看

飛躍陶梭化葛筇潛飛無跡與神通披圖勘破延平事  
又在雷公劍室中

右軍書扇圖



偶愛蒲葵扇影寒  
拈將揮灑動雲煙  
情知龍躍天門筆  
肯與兒童調百錢

王謝當年奕世豪  
東山清興更滔滔  
不應經畧中興志  
留在書名與日高

春閨怨

花落閒庭燕語新  
東風吹夢溼行雲  
就中最是關情處

一寸春光爛錦文

爛者爛漫之爛也

甲申門帖子

一尊春酒酹門扉入手新年所事宜却愧白頭官舍底  
苦無明略佐明時

偶書

人無定志何從好事到難量尚口行一理縱能消百妄  
物情其奈正逢迎

周文矩勘書圖

宮槐陰合玉堂清書葉翻香入細聽內苑近來遊迹少  
太平天子要傳經

鈴索無聲到玉除  
一時人物在瀛壺  
細看簪盞翻經處  
當日安知不有吾

花壓欄干淑景移  
一枰閒煞玉堂棋  
日長正有繡書樂  
未礙從容下直遲

周昉畫楊妃噤齒圖

海棠春睡儘紅嬌  
苦殢三郎厭早朝  
人到愛深無說處  
捧心顰處更妖嬈

題張季雲先生山莊圖

儒將風流素所期兒時幾讀霽

闕

後

喜對張卿賦此詩

却馬巖居楚素懷莫嗟終老未曾諧天

闕

氣

散作恩威震兩淮

思長本與風雲會山迥空圍水竹幽說似

闕

望

建封勲業在徐州

公與徐州帥牙吾答相得甚驩官幕府參軍至蔡改

吏部郎中或沛縣牙吾答即盧天瑞也

樓居春望圖

翠斂雙蛾底事愁不緣春去落花稠歸鞍未得朝天信  
望斷東風燕子樓

徐熙折枝果圖

紫陌春風窈窕歌昇平花果夢宣和寫生忽見徐卿畫  
碧爛紅鮮發興多

後庭新唱滿深宮已覺金陵王氣空畫手忍將忘國淚  
筆端秋實染春紅

趙大年雪霽聚禽圖

風雪龍沙萬里行當時先兆見丹青不然紈綺豪華習  
滿意荒寒落鴈汀

點綴煙林意儘妍沙洲鳬鴈見荒寒君看小景多盈尺  
展放江湖萬里寬

又題美人却扇圖

中饋蘋蘩女所思春風何意醉瓊枝畫家解寫嬌羞意  
不見樊姬脫珥時

大禹泣辜圖

真淳氣散不復古科條  
漸似秋荼深道逢胥靡  
連而泣灼見當時罪已心

陶潛夏居圖

徽宗筆杜  
亨甫家藏

襟懷嘯傲羲皇上  
晉宋興亡筆削中  
千古此心誰會得  
颯然時有北窓風

吾廬瀟灑風煙外  
詩思扶疎樹影中  
典午廢來何限事  
五株楊柳自春風

庭樹交柯綠蔭濃欣然忘却草堂空更憐披耒懷新處  
漠漠平疇遞遠風

題李伯時畫陽關圖

霍清甫  
家藏

晚唐聲教限羌戎才唱陽關慘意濃  
遠節每矜殷侑壯略無離別可憐容

別淚重於烟柳雨離愁長似玉關程  
就中儘是銷魂處不待聽歌第四聲

題梵隆古畫雅集圖

係內府畫上有紹興  
印今為霍清甫家藏



龍章紅爛紹興文入手休驚玉盃新奎壁細看輝映處

半為元祐黨中人

第二句一作內  
府芸香秘幾春

題杜莘老春融秋嶺圖

三分春事二分空料峭寒生破曉風今日簷前天色好

山嵐全似卷中融

甲申春  
大寒

題李龍眠畫九歌圖

不忘君歿即休修辭空說

闕

遊歷山南寺園題其壁

暖煙散處只空崖俯瞰城居亦壯哉

尺

出

不容濯濯嘆無材

江貫道畫江山萬里圖

抖擻衣塵整牙冠  
翼翼終日簿書間  
何時一葉煙波裏  
飽看江南萬里山

繁杏錦鳩圖

繁杏梢頭淑景新  
錦鳩呼雨雨初勻  
儘看活色生香裏

擁頸雙棲過一春

過青崖山

上有圓臺幾頃餘上有老巖公手植今為大林麓矣

鵲巢東下望青崖武惠當年幾往來欲謝雄圖中最重

至今東魯號多才

一作欲話霸圖應寂寞蒼烟深處柏圍臺

過道郎寄時伯威

泰安教授名震

岱宗回望漸微茫空翠隨人過道郎三日曾瞻亭上客

一樽風味詎能忘

題山谷家乘後

闕

初看喜小康宜州天氣固難量一壺醉倒牂柯

闕

古南樓飲恨長

宿東平南衙

昔年曾預幕中籌白首重來此地遊却似絳園春睡醒  
一聲鷓鴣五更頭

黃石公祠雜詩

闕

闕

祠南翠阜重

闕

都在先生指授中

此邑彬彬富碩儒山川英氣未嘗虛何須苦泥神仙說

夜半重來覓素書

東阿前金時自張萬公高子升清鄉侯華卿已下進士第者二十餘人

此老當年一隱淪後稱黃石恍疑神野人莫託山間事

洞穴無情草自春

謂黃山洞穴山顛折立石也

良授書來智益奇一時籌策係安危楚人不逐哀歌散

白首空懷抱石悲

千古陳言雜偽真丹青難寫是精神  
護軍史筆端如畫  
北上風雲逐日新

今古文章不自工後人公論見清雄  
壁間細閱題詩客

笑煞騰騰兀兀翁

黃石祠有詩云天其既與赤帝子我亦願師黃石公題曰騰騰老後復曰

兀兀翁騰騰老蓋楊紫陽也兀兀翁楊飛卿也二公爭相為已詩者數年遺山聞之曰詩則非佳爭之意甚可為一  
噓也

郭將軍巨廟在肥城縣西水里村  
南山上土人云巨嘗趨熱來此欲瘞其子於村傍果然余以

謂孝忍者也

家宴時供菽水難宜堪孫息共盤餐生埋設若同純孝  
不念將慈變忍端

水里山頭郭巨祠歲時香火野人思交哺因羨慈烏鳥  
斜日歸飛滿樹枝

一作啞啞却  
羨慈烏鳥

繼司毅夫韻題野堂壁

毅夫  
名仁

郊居靜有耽書樂客至都忘懽歲災喜向壁間留語去  
草堂樽酒記曾來

眠中故友三年別霜後春桑一例災暫解歲憂誠士樂  
馬頭遙指野莊來

武惠公故里

在長清西五十里  
今稱鵲里者是也

鵲里西連武惠林蒼岩烟埋沒石麟深固應千古桓公業  
長聽黃鸝送好音

遊百家巖雜詩

月池懸溜落蒼窪岩竇分居可百家不羨碧瀾秋色好  
倚天驚絕赤城霞



龍鬚草細雪婆娑石樹玲瓏碧玉窩欲訪煨爐懷舊隱  
老僧指示隔煙蘿

山居最苦水泉慳明月池深湧碧瀾寺仰以清山藉潤  
細教螭口瀉高寒

山煙起處竹林蒼白鹿崑高半夕陽長嘯至為鸞鳳去  
公和當冠七賢堂

玄髓丹書兩遇難碧山猶說有仙壇千年留在嵇康恨  
石上清風漠漠寒

亂山合還排青闥細路縈紆走白蛇十里風煙吟醉底  
柘園莊北日初斜

清醕蒸杭戶戶香百門山下喜初嘗太平有象豐年是  
翠竹梢頭看簸揚

欲往蘇門半月過青帘巷裏總高窩寓形宇內知能幾  
對酒當歌不樂何

十月山陽黃落秋隄風寒色入貂裘蹉跎非泥林婆酒  
更為諸賢一日留

晉隱祠邊落照紅  
自來伐木竹林中  
且休輕議前賢輩  
自執牙籌笑阿戎

黃烈清泉在碧巔  
當時瓢飲致高年  
情知泥水能充腹  
空使人間作笑傳

題朱孝子詩卷

道傍積土作高標  
存歿中間慰寂寥  
見說一方多錫類  
秋風惡水變鳴皋

中古識封高四尺  
朱生覆篋到三尋  
所憐哀俗顏波裏

能見終喪不匱心

門閭旌異對堂封春在林墟洩樂中白首已慚朱子孝

荒阡望入漢堤東

予家三代祖塋夾堤東西相望凡三處

長至日同李靖伯過高仁甫新居即事

禮義為方邑不多處心極厚已澆訛首從吾輩家風異  
其奈閭閻鄙俗何

藩籬限隔苦無多撤去寬於四海和昨晚杖歸心適喜  
樂於常棣燕時歌

中唐一席間維藩嶺眼高於嶺嶂巔愛煞西家高老子  
晚沙能暖鵲鴿寒

讀明皇雜事

西內淒涼慘落暉高將軍去事猶危起居聽徹公卿表  
淚溼龍袍祇自悲

元日門帖子

堂落有成永思遠慰歲時闕近逢季主親闕

構新年儘笑聲

世事雖闕覺累輕閒心有味勝時榮不妨鄉社浮沉醉  
一曲酣歌樂太平

跋醉道士圖

床頭傾盡玉雙瓶已醉猶能百態生若問一壺中所樂  
醉鄉白月自昇平

跋墻間圖

乞食歸來意有餘豈知內子涕沾濡相逢半是墻間客  
底用經營畫作圖

跋理宗題馬麟畫折枝木犀圖

花中神品趙昌師又向臣麟見折枝不惜一天風露潤  
百林樓晚要新詩

跋醉漁父圖

浪急舟輕任自由得魚歸去博新芻醉來省記靈均語  
獨速煙蓑笑不休

題卜者詩卷

卜筮精微未易通靜能知遠要深功裹糧去訪賢師友

喜為題詩送易東

乙酉元日門帖子

莫認時榮真福順休從勢利論  
人情願將風日輝輝氣散作豐年笑樂聲

題德長老夢齡圖

高情千古一坡仙夢入西堂豈偶然  
只著吾家公案論嗜心將至有開先

修齡親說夢中傳寫出梅花老樹禪  
更愛鹿菴人品峻



不隨王導共周旋

鹿卷云好將半桶井華水過與閭黎洗面顏

露堂夏日即事

日長人在露堂間何物相看慰我顏  
碧嶽方池湖水滿一峰蒼翠出君山

題遺山先生手書雜詩後

河間王成之收

文鍵親承謦欬餘又從珠碧見遺書  
常疑落落江山筆不放奎光到玉除

江鄉雪景圖

勢利嬰兒百尺竿雲臺爭似釣臺閒料因篷底秋江夢  
不到君王物色間

秋江待渡圖

楓林沙步夕陽蒼一棹秋煙待野航江上西風晚多急  
行人歸路不須忙

寒林圖

溪山一雪自幽深都付騷人入苦吟最是畫工留意處  
晚煙瀟灑萃寒林

題水牯圖

姚黃魏紫動遊觀何似田家黑牡丹萬有困倉由爾出  
論功消得畫圖看

秋山訪友圖

蕭蕭楓葉映青山詩在風煙紫翠間早晚得歸林下去  
一溪秋水伴君閒

闕峙石樓連佛屋灘橫八節走青伊杖藜都是香山老  
斜日青山獨往時

讀後漢西域傳論

世外鴻荒古罕聞角端人語鳥雄尊縱橫最愛宣城筆

理絕人區略不論

角端獸名極壯大能諸國語

題樂天不能忘情圖

駱馬悲鳴頻玉珂停杯重聽柳枝歌做成一段閬公案  
轉覺香山長物多

楊柳新聲滿洛陽尊前風味老難忘筆端拈出新詩句  
似為樊姬作嫁裝

韓白二公老境

日月閒心要破除  
香山晚節亦區區  
藏詩葺寺皆餘事  
猶勝昌黎聚博徒

籍也胡為勸著書  
要將斯道濟時須  
情知千古潮陽筆  
肯作分章摘句儒

太一宮

華表人歸鶴未歸  
空從雲氣望蓬萊  
西池一望桃千樹  
猶記中和手自栽

露溼庭松偃蓋青一聲幽磬隔疏櫺多應金簡朝元罷  
自炷爐香讀道經

庭樹瀟瀟綠滿廊日長深鎖碧窓涼隔簾遙見秋來處  
一葉輕黃望井床

漠漠陰風轉石壇長廊踏破碧苔寒徑呼徹放松扉鑰  
看罷梅花問竹安

倚竹圖

天寒翠袖儘輕盈暮倚湘筠思不勝何異澗阿幽隱士

長材空抱乏賓興

遊龍門雜詩一十首

共西  
山名

山到龍門勢轉奇  
十年軒豁露朝曦  
從教馬足徐徐進  
正是山紅澗碧時

百丈瑤泓湛碧崖  
杖藜不到是空迴  
諸人也解詩人樂  
挽葛攀藤一例來

龍門形勝自天開  
細瀉銀河灑碧崖  
我老世間塵土夢  
百年能得幾回來

直上危巔弄瀑流空濛飛灑翠雲裘看來潭面無纖翳  
人道龍泓是炭湫

冷泉飛下碧峰尖鮫客綃長萬縷纖却為夜潭霜月苦  
山靈長下水精簾

龍門峽束石嶙峋只有懸流竅可人才到寺臺心已喜  
竹梢明處拖天紳

竹上題詩石上休劉郎勸酒薛郎謳奇探不識風雷窟  
若比潮陽更款留



安行舍策上稜層醉裏陳州羨不勝玄極近南雖峻絕  
似君筋力尚能登

不惜登危馬力微歸時風袖喜披披紫煙暖藉青鞋溼  
步下蒼陁不覺疲

山喜詩人作晚粧野煙不幻碧峰蒼婆娑醉藉橫披草  
更為山英倒一觴

筠溪軒留題

山川明秀在共西人問其中幾杖藜三十年間還默數

青燈兩度宿筠溪

筠溪溪上好風煙又向幽人借榻眠欲就龕燈尋道話  
却成尊酒醉留連

題天慶觀壁

至人心孔有天遊何似歸潛德日休千尺澗松終自老  
一菴閒地且相留

擾擾城居足是非靜觀秋水物空齊近年豁盡爭衡氣  
卧看虛窓日影西

春畦綠滿桔槔閒吟眺高城有往還不著人光牛背上  
時來支笏看西山

闌闌都來掌許中白頭相會幾人同時將一榼如水酒  
傾瀉春風滿太空

題史仲威修鄧州文廟詩卷

禮殿修完到大成仲威一日得嘉聲却憐吾郡膠庠地  
二十年來斷不行

題歲寒齋

松柏青青貫四時木中推重為幽姿史君特用為齋榜  
要見貞心老不移

題東坡手簡

文章大節中所立海岳英靈未易招只為峻高人競仰  
有時秦吉作鸚鵡

題山谷手卷

書學推公果若何紆餘全似右軍鵝兩行醉墨南樓帖  
一字千金未足多


寄楊參政

紅藥堦前露氣新  
五花行判舊經綸  
除章莫厭鈞陶細  
散在人間是好春

閒中何物是窮愁  
細把調元入校讐  
勘破漢中三策意  
忍從刀筆論鄮侯

謝太傅奕棋圖

勝負胸中料已明  
又從堂上出奇兵  
怡然一笑文楸裏  
未礙東山是矯情



秋澗集卷二十九

欽定四庫全書

集部

秋澗集卷

三十一

詳校官侍讀學士

臣沈咸熙

侍讀臣孫球覆勘

總校官降調編修

臣

倉聖脉

校對官助教

臣

汪錫旌

膳錄監生

臣

朱鎮



欽定四庫全書

秋澗集卷三十

元王惲撰

七言絕句

題蘭氏三桂堂字說手卷

當時山斗仰蘭公此日開封有父風著眼讀書堂下去

又看三桂發春紅

著一作放

題玉局公所畫竹石

秋壑家藏

此老何心作此君一枝中發錦江春無窮露葉烟梢意  
散作先生百億身

關河形勢圖

關河百二控秦頭滿目斜陽獨倚樓設險守邦須尚德  
每多吳起說文侯

秦川展掌華山高千古關河締構牢早晚去施通濟手  
浮航如畫鎖驚濤

壓關樓上醉憑欄一片黃流入斷山彼索此疆俱寂寞

山河空鎖夕陽閒

解鞍圖

川流縈帶燒痕青萬帳風煙戍漢營長記散軍郊射罷  
丹青圖上看升平

蕭蕭牙帳野河春羽獵歸來日未曛轉放畫圖還記得  
二年鞍馬過牛羣

高空雲迥射鵬還細草平沙困解鞍醉裏清寒將夢去  
春風吹雪點旗竿

題黃閒飛鞚圖

金錯盤陀絡玉鞭  
春風飛影下瑤池  
丹青明見臚傳意  
花柳深宮燕八姨

年年十月幸溫湯  
詔給辭臣半驢驢  
最見流雲瀟灑處  
津陽春色曉蒼蒼

讀唐武后璽紀

秋日花開未是災  
有瓜無可摘黃臺  
鎖間辦著青蛾笑  
爭指朝堂鬼朴來

讀狄梁公傳

魚鼈霑恩徧九垓  
鳳池春色接鸞臺  
敝袍不染梁公血  
辦作幽囚一聚埃

二馬圖

振鬣長鳴萬馬瘖  
肯教閒損絡頭金  
多應縱駕華清去  
飛過宮前御柳陰

讀富鄭公傳

奉詔東來止國門  
悔將威克動嚴宸  
繞爐不合終宵眼

六丈夫知是聖人

玉堂閒適圖

醉岸烏紗殿影東  
宮花低映酒波紅  
興來草罷長楊賦  
獨占高槐灑晚風

淵明漉酒圖

此圖以氣象筆法較之恐是王雲筆也雲秦人意象  
多偉麗而少雍容余嘗觀斬蛟及內殿橫吹等圖故  
敢指此殆雲之筆也然近代以來如雲之工者亦不

可多得云秋澗老人王惲序

牀頭新釀漉來空清濁君看固不同門外征車揮已去  
秋香籬落醉西風

紛紛葛屨雜華纓何物衣冠可重輕莫若脫來還漉酒  
一杯時復聖之清

秣田一粒不霑唇嘗恐春醪負此巾儘著輕紗渾溼却  
尤勝憔悴染京塵

停雲時鳥日從容長在先生醉眼中劉宋禪來非一事

五株楊柳自春風

蒲輪遠聘亦濃恩處士雖微實晉臣  
嘗愛紫陽書法當不教輕染寄奴塵

莊宗橫吹圖

郭相西征奏凱還阿嬌歡寵鏡交鸞  
却嫌暖殿春風燠玉管橫翻曉吹寒

霸業艱難百戰開侈心何苦溺優俳  
豈知兩部仙韶器總是君王火葬材



繼周南樂見寄巖韻

長慶詞人興寄長當時元白關軒昂江山正有潮陽筆

千古詩壇自一行

一作細嚼君詩興緒長孤吟空效鵲頭昂解教老媪能通曉留與香山作

雁行

莫嗟朝鏡鬢毛霜總道寒花晚節昌一級散官增正七

三升春酒醉公堂

郊亭秋月

水天上下月微茫冷浸郊亭夜色蒼我欲去尋幽隱客

一天風露靜琴張

括諸山水勢兩分

冀北諸山水兩分山西流注會龍門脊東衆壑歸幽野  
號作桑乾入海奔

復作詩以贊之

職方引據說空繁到底終無一定言愛殺九峰真具眼  
高空直下看中原

寄馬左丞子卿

士達察判行求先容不敢書謹以亂道二章聊代起居之間且奉一粲云

治道原來有本根聚精多在鳳池春近因拈出中堂記  
滿眼經綸半魯人

一別春坊歲五過向來心事總蹉跎  
遙憐紅藥堦前露  
霑丐拈淡意最多

### 學圃亭

崔君隱德老談經俯仰乾坤一草亭  
莫為處心親細事

正宜烹煮削蕪菁

桔槔上下任畦丁  
春韭秋蔬用不勝  
若向邵生親問訊  
瓜田風味勝東陵

明農數事稱周宰  
抱甕澆園說漢陰  
兩事若論為拙計  
空拳搏虎更何心

庾郎三韭種來青  
鄭老秋瓜結已成  
食肉飯蔬原有分  
不應空戀五侯鯖

鄭老謂瓜州刺史審也

東鄰近接香山里  
南浦今稱處士涯  
活計看來原不惡

自鋤明月種梅花

題紅葉扇頭

故宮秋色醉來鮮  
浥露吟風雜暮蟬  
折得不浮流水去  
一枝留伴月中仙

深宮不禁水東流  
賦就幽情孰與酬  
紅露滿山秋正好  
等閒休上建章樓

今年火盛若為攻  
盼盼西風一掃空  
忽見扇頭紅錦色  
上陽秋意滿吳宮

雅歌一十五首

并序

雅歌者為丞相武公作也公經畧河南之二年有詔  
上計行臺時權臣承制威振中外拭吻磨牙婪婪橫  
噬凡可以中傷羣辟者靡不畢至公以大忠致謹乃  
心王室斂衆人之責為己責以天下之憂為己憂一  
身利害略不為恤也蓋欲俾朝廷上存公恕下不失  
民心為重其大節有如此者竟能感格帝心恩終簡  
在自非精忠貫日其孰能與於此哉所謂臨大事處

大變而後見其真將真相之度焉因追作雅歌一十  
五章庶幾流播斯美使後人頌而歌之顧望若神人  
然其辭曰

讀來黃卷有深功都見平時日用中朝下引車常慕蘭  
行間拔士每知蒙

陰闔陽開制總司諸人何與到傾危微臣有罪天王聖  
不患朝廷遠不知

衮冕桓圭極品榮較來得失一毫輕空傳馬援囊珠謗

終見汾陽貫日誠

天蓄雷風未動威  
棲棲遵渚歎鴻飛  
見知正賴龍庭帝  
笳鼓歸來有袞衣

萬馬蕭蕭入漢巴  
行臺東下控中華  
方思霖雨須賢相  
豈特春風動虎牙

萋菲方成貝錦哀  
睿思熒惑若為開  
天教中令心如日  
几几俄瞻赤舄來

品彙流形共化權  
歲寒都到老松邊  
欺殘太古陰崖雪



始信貞心老更堅

儀比鸞凰重比山功高心小古為艱平生幹當江南事  
事了聲名兩不關

羣飛鍛翮入罝羅棘上青蠅訝許多良玉儘禁三試火  
周人坐構百升歌

亢則憑陵懦則摧秋霜中烈外低徊虎臣剩有回天力  
更著閭兒與孽媒

拓境每憂王土窄息肩思與萬方休生平戀闕丹心在

風雨何傷一葉秋

身任安危五十年老臣懷抱若為宣始終正有汾陽夢  
不到江湖范蠡船

長圍破蔡仁聲著積穀吞吳策畫深三十年來分閫地  
智名功勇總無心

長憶中堂掌固初宛陪高步在亨衢百官禮絕真除日  
門閤蕭然一事無

釣魚山下護龍旂蟠冢江邊奏凱歸一馬二僮東下日

路人拭目認征衣

丁亥歲門帖子

坐賈謀生計已癡  
歸田無力理耕縻  
一家風雪渾閒事  
四海豐穰是素期

汴梁故宮寒食

人家賣酒繞宮池  
爭插青旗曲作圍  
簫鼓漸多寒食近  
一樽先為典春衣

熙春閣

傑閣當年燕御頻  
鼎煙未盡慘兵塵  
土堦三尺蒨茨底  
人自熙熙物自春

倚竹圖

錦字挑香翠  
易顰一枝修竹立  
湘裙定情正在水霜操  
不到琴臺日暮雲

粉香沾袖怯輕寒  
都著幽情寄竹間  
多是楚山湘水怨  
不應空待賣珠還

已丑歲門帖子

大郎赴部應求叙老子傳心要醉經二事儘能如所願  
一家編簡有餘青

韓生寤寐春秋學陳儒薰酣寶訓文磨礪童孫能寸進  
一家春滿看祥雲

題顯宗墨竹

撫軍闕思到湖文筆底秋筠見本根絕似承華檻欄看  
露梢煙葉總龍孫

堯民圖

日出漁佃日夕歌蠶衣耕食樂天和細思厯象星辰外  
帝力於人更有何

己丑五月十五日過王氏祠堂

兩軒梅竹足興哀親見春山手自栽前日問安人不見  
翻翻風葉送愁來

兩世規模有遠圖轉頭庭樹影扶疎顧瞻阿大中郎輩  
信覺嵇公德未孤

巢父飲牛圖

濁泥常恐污吾牛特地駟來飲碧流縱使許由辭位去  
汗顏終是對宸旒

耕田鑿井不知勞長恐逃名未得逃最喜帝堯平治事  
一犁春雨滿江皋

徵庸禪讓兩無心駟飲時過碧澗潯若見後人牛傳事  
入山惟恐不幽深

舜授堯傳兩不聞最憐牛力晚來新一鞭了却東臯事  
潁水箕山分外春

若訝箕山易所操雖辭堯讓匪吾曹  
桐江江上垂綸客  
一樣清風萬古高

清明後二日南莊拜掃回偶占

寒食人家節已過秋千猶在院東坡  
今年春日光風好  
拜掃歸來笑語多

野叟爭求醉筆新因書聊歇酒杯頻  
勸農說有新冠蓋  
要識君侯是老親

送蔡挽歌



高墳嵒嵒沒荒草白楊風悲和鬼歎人生到此是徹頭  
一倒灰塵無醜好

祖筵纔徹哀號起  
翠柳多儀殯蒿里  
向來送者各還家  
冥冥獨卧黃泉底

人世何短白髮多  
駒隙光陰不奈何  
才見春風吹草綠  
又看庭樹葉辭柯

人命輕微如薤露  
百年歡樂能幾度  
森森鬼伯若來催  
相將共入黃墟去

哭聲交慘簫笳咽樹架爭嚴縞素餘昨夜高堂猶暖熱  
今宵荒野恨何如

相將執紼送華輶母子恩深哭不休報德不銷埋石痛  
低空還有斷雲愁

方相擊凶魂攬馬閭里親知滿中野只知哀挽送行人  
相看誰是長年者

細君推氏哀辭

神情減自女孥捐病後支持又八年最著老懷悲悼處

歿猶知惜畫叉錢

性姿貞靜伯姬恭四十三年好夢空一閔夜臺無復見  
悲聲留在白楊風

斂來三夜夢平生明說先姑已侍行喪稱有無能戚了  
何須易治太經營

中堂北牕挂殘魂戀戀情思在子孫奉祀更當嚴在日  
忍令哭臨限朝昏

水西原上有新塋三世親喪力助成一旦夢隨先妣去

有知當慰未忘情

纔過彌誕無旬月遽變辭容只兩朝寶靨暗留嘉菊細  
黛螺空見遠山遥

營葺貧家鵲有巢百年心事憶同牢空餘深夜回溪月  
獨見淩波采澗毛

六十難為天折悲百年偕老是同期篋衣滿意遺鄉在  
空結纓襦九十儀

病倚中廬望大兒娟娟心目已難支朦朧帳影魂衣閣

腸斷燈前擁髻時

暗用通德悲  
野田荒草事

去年扶病到新塋  
歌管杯盤水曲亭  
今日重來人不見  
杏花零落柳條青

素棺已蓋鋪丹旒  
舊物難窺瘞玉臺  
冉冉縱隨仙馭去  
珊珊猶憶夢中來

將持仲子庶同嫡  
主葺貧家儉作豐  
存歿較來無少憾  
正緣余厄致終凶

恩榮頗浹魚軒貴  
祿食同霑石甯田  
忍死最憐相叩問

六旬之上有餘年

舒徐委悅澣餘衣能盡桃夭灼灼宜四十三年中饋地  
儼然宗祖饗多儀

團團香火坐庭闌欲話平生氣已微生歿慮來真大事  
幾回含笑說先歸

逝水碧縈長寢地畫簾香暗送時車閒窓不待粧奩感  
遺恨空存禱嶽書

百年同穴是同期一病彌留秋草萎垂老境中成歿別

九泉相見話真知

緡錢灰冷過黃昏  
閃閃寒釭閉閣門  
只有此生來夢裏  
幾迴含泣認離魂

健婦治家勝丈夫  
維君真與健同符  
半生黽勉公家事  
一米私門不累吾

勸余過飲省文思  
切戒無多酒後辭  
翁媪老來惟我爾  
百年門戶要扶持

蘭枯蕙槁不禁風  
一夕吹香入殯宮  
把酒試澆橋下水

不容將恨到湘東

當餐愁對瘳眉案升屋空留復魄衣誰遣兩行知己淚  
浪浪併向老來揮

薦繁人去考堂空內助功多想肅雍說似老莊休鼓缶  
固無形氣奈情鍾

壺漿朝奠愴蒿蓀露溼哀衣半淚痕每囑兒童莫歸早  
水邊恐有未招魂

忘懷無似老莊盆使作何知委路塵詩到悼亡能自釋



情文相稱是安仁

襁殯親遷葬百泉久謀銘誄入瑤鑄君須少候無多恨  
行見貞珉表墓前

長筵拜慶諸姬上隨官名邦二紀間秋入池臺芳徑歇  
春歸庭院落花閒

行來古禮不多難含斂塋藏淚涕潛莫訝初終無佛事  
此心求在有無間

衣衾棺槨無遺憾親戚悲哀有至情四十三年庚子月

西河原上葵先塋

李早蕃馬圖

羣奔角壯任郊垌已入竿頭莫力爭  
惜取蹄間三大逸望雲秋計鐵山程

跋藍關圖

潮陽英氣凜中天愁絕南荒瘴海煙  
不道生還陰有相自陳哀表亦堪憐

曉風吹雪下關頭點綴行人去國愁  
展盡畫圖還自惜

七閩南下即潮州

題趙克敬遺安亭

襄陽苦節說龐公  
趙氏貽謀意與同  
肯羨東鄰驟榮貴  
轉頭歌舞畫堂空

趙生卓爾見青衿  
及長行身稱克欽  
為問遺安安所止  
一家鴻鵠住高林

題張氏致樂堂

生前菽水儘餘歡  
身後追思世所難  
誰似考城張孝子

至今供具潔盤餐

刻桷丹楹燕寢新  
食前方丈處華裀  
一杯不及慈顏樂  
負米終慚季路貧

壽萱亭

葵丘張氏孝無違  
終歲承顏着彩衣  
入戶優然親不見  
一簾風月澹春輝

凱風吹棘棘心柔  
罔極恩深痛莫疇  
不羨潘輿花滿縣  
一枝金鳳儘忘憂

潘店早發

一鞭行色甌閩道過處人多說險夷忠義此心能自信  
風波前路不須疑

儀封

三代漸民道義深抱關疇匪大賢心披雲纔遂瞻依願  
便解天教振鐸音

睢州道中

馳傳北經梁孝苑垂鞭東過宋襄城征人折盡隋堤柳

風捲枯蓬逐馬行

汴堤

近自汴州開夾道遠連淮甸卧長虹若論往返行人便  
道在勞民却有功

寧陵縣早發

殘缸斜照耿孤懷夜火吟餘氣頗諧睡暖不知霜力重  
起看梧葉滿庭堦

蕭相國廟

海寓清澄入帝圖  
忍將牛渴飲泥污  
不思世教從中降  
得約秦奇意儘都

聞畸人話芒碭山事

芒碭山遠鬱蒼蒼  
斷口雲連十里長  
兩段素蛇今化石  
至今神異說高皇

望碭山縣有感

裴劉起義晉陽宮  
三百年來立國雄  
一旦剪除無噍類  
厲階誰想在全忠

宿州道中

辟寒宿酒多難醒數堠前征覺易行前去維揚猶七百  
黃雲衰草宿州城

樓子店道中

汴溝已是荒亡跡湖石重開禍亂基徽煬較來同一病  
九泉相見不相嗤

敗門無策更開邊萬石移來起艮山天意固遺亡國恨  
兩堤秋草卧孱顏



虹縣道中度長直溝

望入綏寧接楚雲  
老婆山遠界溝鄰  
小河河上淮東地  
萬頃黃蘆不見人

渡江

生平夢寐瓜州渡  
此日風煙指顧間  
却恨中流風浪惡  
雄觀應欠上金山

潤州甘露寺近為火焚掃地

望空北顧無雙寺  
行入西津第一州  
江影隔山搖素練

行雲和夢鎖朱樓

桃源圖

劉君卿  
索賦

淵明既號葛天民  
流水桃花到處春  
明見筆端閒寓興  
武陵休苦殫漁人

東來連舸泛長湖  
雨鬢水霜儘瘁癯  
偶值漁郎心已媿  
更堪三復武陵圖

浙西到處武陵溪  
稍涉幽深路便迷  
始信避秦原寓說  
淵明遺世更羈棲

虎丘寺

真娘誰為惜娉婷  
李白題詩在竹亭  
為洗鷓鴣斑金縷  
盤細烹泉眼較中冷

姑蘇館夜雨

吳亡越霸兩蝸爭  
朔吹翻江恨未平  
一夜不眠思往事  
姑蘇臺下雨連明

宿寒山寺

偕榻僧窓夜氣清  
梅花香細燭花明  
鐘聲不取唐人例

一覺安眠徹五更

伏生授書圖

遺書灰冷散飛烟老喙重宣即粲然三策竟從名數說  
潁川方寸殆虛傳

題醉隱墨竹

清溪映竹竹連雲冉冉晴梢醉墨新却為歲寒心事苦  
暖烟淡濃要橫陳

露梢風葉喜晴春醉掃吟看卧竹根欲見此君生意盛

滿川煙雨半龍孫

西湖

一湖碧水山三面  
滿眼樓臺堰一條  
只為近年荒廢久  
花無容色竹無簫

飛來峰

西湖廢撤無多景  
靈隱莊嚴有勝幽  
扶杖冷泉亭上看  
日斜猶為此山留

靈隱寺

山緣松竹烟光潤寺倚峰巒地位雄  
凭檻忽驚靈鷲上世間真有化人宮

旋開僧牖觀山罷閒逐遊人看寺迴  
買得兩錢乾菓子步穿經洞引猿來

錢塘

噫流無壯浙江潮刀削銀塘甃碧牢  
三十里長無兩用既防崖路障驚濤

錢塘西岸

市樓接望無三里嶺嶂迴環自一川  
曉日人家炊爨罷  
竹籬香滿碧松烟

人家即閭閻江皋十室看來四五  
逃閒向老人詢所以  
近緣軍過苦相搔

富陽縣會江樓

山光簇簇無連嶂江水瀾瀾漲碧瀾  
何處風煙見真境  
富陽樓上倚闌干

富陽道中

兩浙風煙入富春眼中形勝鬪嶙峋一樽不吸江山綠  
笑煞桐廬把釣人

江山畫裏看清雄魚稻鄉中樂歲豐不是釣壇壇上客  
未能忘此就三公

早過新城黃山鎮二首

水無絕壑山無麓春麥收來秧稻穀行穿松逕看烟巒  
一段碧紗籠水玉

奧溪引作長畦浸宿霧空濛破墨山馬上不知行役倦



村村都在畫圖間

白峯嶺

儀曹苦厭為山囚  
霧幃煙屏看未休  
行過白峯三十里  
桐廬江上重回頭

七里灘

桐廬江水綠于藍  
兩岸山攢碧玉簪  
前去釣臺猶數里  
兩峰竒石見巉巖

共惜殘年得遠遷  
豈知天意却相憐  
筆頭少得江山助

便遣空迴亦愜然

嚴州道中

高盤山頂下深淵馬足長驅不易前  
幽鳥背人飛去速一聲津鼓突江煙

叢叢吳岫煖煙生峽束江奔徹底清  
斜日篙師催進棹三灘難上要雄撐

蘭溪縣女步道中

豫樟蔽日無黃落竹篠經霜更碧鮮  
記取江南光景異

煖烟晴日是冬天

三河道中

龍丘風土類中原兩勢山開百里川  
白鷺水田摩詰畫  
桃花溪洞武陵船

龍游道中

路入龍游不見山縱橫阡陌穀江邊  
穿籬臘笋如槍矗  
夾道寒花似火燃

龍游道中聞鴈

金匱要略卷之三  
避寒來趁稻梁肥水遠山長結伴稀已是江湖遠行客  
一雙猶是向南飛

西安道中

衡州  
屬縣

西安荒惡路清寧水泛山行夜不停却為近來山寇發  
大明猶未撤關扃

紫溪嶺

紫溪梯嶺一層層況復鞭羸帶雨登頗笑此山藏行迹  
世人曾不峻為稱

昔杜止軒告余云楊西庵俠黠談諧之雄者也世人不知其然不肖何有竟負天下滑稽之名楊何深而僕何淺也予謂分水與紫溪嶺亦然分水雖大平而易登紫溪雖小峻而難陟今世人以大安至險可畏為言而紫溪畧無聞焉與杜顯晦初不殊也

車盤嶺

時沾窮臘天多雨路轉巔崖險可驚辨着壯心時叱馭  
兩程併作一程行

武夷山

朱文公書  
院在焉

紫陽集裏已曾遊  
此日輕舟過山右  
握衣不獲拜遺祠

武夷一棹空回首

建陽道中

二更  
到縣

山溪流急遠聞聲  
月暗林深信馬行  
衆宿斂芒南斗大  
半天驚看六星橫

謝朱詠道山長來訪

名沂今  
為亭山

故縣經兵廢不存  
考亭依舊泰山尊  
南來有幸猶親炙

得見先生四世孫

八仙驛

灘峻渦旋陡下危  
柁師招處和聲齊  
八仙驛畔山如畫  
一棹清風下建溪

劍浦

湛湛雙溪劍浦秋  
張華祠下更深幽  
神兵不著奸臣去  
真是蛟龍亦可羞

李延平道南書院

延平名祠  
晦庵之師

延平劍躍蛟龍窟黯澹灘危滌瀕堆二事聽來皆野語  
道南書院重徘徊

高桐道中

梅花如雪小桃紅夾道修篁翠幄濛折得一枝春在手  
蠟香吹滿馬頭風

上水船

亂石叢堆積鐵然湍流翻雪沸洄淵半崖匍匐人如蟻  
百丈驚看上水船



杖洋

鐵喻篙師紙喻船上灘難比下灘難傳呼緩棹蘭橈去  
路入杖洋要細看

蒼峽道中

雨後  
看雲

滿嶺閒看雨後雲空濛疎薄畫難真蒼山巧露青蓮色  
都著銖衣掛法身

蒼峽鎮雨夜

地連吳越已夷蠻蒼峽東南更二千鄉夢不成非野宿

雨聲還向客窓偏

摩天嶺

寒雲直上看高層峻極諸山莫與京不作閩清具瞻物  
摩天空擅最高名

秀才嶺

西登盤上卧羊坡東降平川谷口蘿為問蒼巔高幾許  
微行人指樹頭過

水口

山路捱來僕馬瘡  
方舟南下頗安徐  
推搖柔櫓嫌曛黑  
行趁漁燈一點孤

小箬

冬陽暖透征衣燠  
溪曲寬從水口開  
夜半朔風吹月墮  
臘寒還逐早潮來

湯池

湯泉為說盡唐虞  
一脈溫從地氣生  
滌淨世塵初不汚  
根源方信本來清

甘蔗洲

山明溪靜絕纖埃  
望際川原四面開  
忽訝兩涯風浪湧  
舟人云是海潮來

雨中江行望甘蔗洲

方舟搖颺櫓聲齊  
細雨逢窓看岸移  
望入蔗洲何眇靄  
霧江平抹白煙癡

懷安縣

縣依溪曲兩岡蟠  
翠竹晴沙轉雪灘  
前去郡城饒候迓

官儀都是夢中看

總題

無窮山轉青龍峽不盡溪蟠碧玉淙西自鎮江南抵福  
三千里路略相同

義門任氏詩

并序

燕雲風土雄碩故其俗純厚多以孝友稱御史蘭君  
寶臣屢談於余吾鄉有任著飛卿者樂讀書其家風  
義尤為昭著至三世同爨鄉鄰化而慕之願得一言

發越其微因賦二詩于以見蒸蒸所自且勉夫錫類  
不匱之心焉

燕雲任氏世同居和氣薰然樂有餘春在紫荆庭樹底  
綠陰初不見扶疎

一門高義冠鄉鄰累葉相承棣萼春不學張公書忍訓  
友于原是孝心純

秋澗集卷三十